



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

**Palestine ato kilonser inyaktsü
Mohammad Mustafa shimogo**

**CM Rio-i 3rd NE Games 2024 indang
Games Fest & Games Village semzüktsü**

VOL. XXI ISSUE NO. 153 (ADOK 153) DIMAPUR

KÜPTOKNÜ (SATURDAY)

METSÜREMI (MARCH) 16, 2024 ₹ 5.00

ECI-i Electoral Bonds alizükertem osang lemsatep

New Delhi, March 15, 2024 (Agencies): State Bank of India (SBI)-i data agütsüba nung ajemdaker Election Commission of India-i parnok indang website nung Electoral Bonds indang osang lemsatepogo.

ECI-i PDF files balala ana nung Electoral Bonds dak sendakba osang metetdaksüogo aser mezüngbuba list nung linük nung company aika tenüing lir.

Tanabuba list nung Electoral Bonds aliba kija tenüingtem shia lir aser sen teimtiba tenla agütsürtem rongnung Future Gaming and Hotel Services Private Limited temaba jenjang nung lir. Iba company-i political party balala nem Rs 1,368 crore tashi Electoral Bonds tenla agütsüogo.

March 2022 nung Enforcement Directorate-i Future Gaming anema bushisüngdanga liasü aser parnoki company balala ana kübok Electoral Bonds alizük.

ECI-i lemsatepba osang ajanga company aser kija 1,260-i Rs 12,769 crore jenjang Electoral Bonds alizükogo.

Iba list nung steel businessman Lakshmi Mittal nungi billionaire Sunil Bharti Mittal'er Airtel, Anil Agarwal'er Vedanta, ITC, Mahindra & Mahindra, Future Gaming and Hotel Services ajanga Electoral Bonds nung dera lir.

Supreme Court-i ECI dang

March 15 tashi nung iba osang lemsateptsü tetuyuba agüja liasü.

State Bank of India (SBI)-i Supreme Court tsüngdang affidavit ka agütsüba nung April 1, 2019 aser February 15, 2024 tsüngda donors-i electoral bonds 22,217 alizükba osang shia lir.

Iba nungi Rs.12,769.40 crore alangba bonds 22,030 tashi political parties keti ao.

April 2019 nungi taküm January tsüngda BJP-i electoral bonds teimtiba angu aser March 2023 tashi nung party temi election bonds nungi sen anguba nung BJP-i Rs.6,060 crore shi angu.

Sen teimtiba anguba tanabuba political party ji Trinamool Congress (Rs.1,609.50 crore) liasü. Külen India nung opposition tongti Congress-ia Rs.1,421 crore angu.

Highest Individual Donors

1. SN Mohanti Rs 45 Crores
 2. Laxmi Niwas Mittal Rs 35 Crores
 3. Laxmidas Vallabhdas Ashmita Rs 25 Crores
 4. KR Raja Jt Rs 25 Crores
 5. Rahul Bhatia Rs 20 Crore
 6. Rajesh Mannalal Agrawal Rs 13 Crore
 7. Saurabh Gupta Rs 10 Crore
 8. Raj Kumar Sharma Rs 10 Crore
 9. Rahul Jagannath Joshi Rs 10 Crore
 10. Harmesh Rahul Joshi Rs 10 Crore
- Anita Hemant Shah Rs 8 Crore

NBSE-i school tekolakpurtem den senden amen

Kohima, March 15, 2024 (TYO): Nagaland Board of School Education (NBSE)-i tawa tasen shimba head of institutions den senden ka menogo.

Nagaland Baptist Church Council (NBCC), Kohima indang Platinum Hall nung senden amendang district 16 nungi school 160 tekolakpurtem aden.

"NBSE-i küm shia head of institutions tasentem den senden mena arur. Talisa National Education Policy (NEP) 2020 tenzükba sülen iba senden ya kanga tongtipang kümogo" ta Secretary, NBSE Rangumbuing Nsarangbe-i ashi.

"School ka nung tekolakpurtemi tongtipang shilem agi aser pa/lai angazütsü jangratsüla aser school tajungba akümtsü merangtsüla. NEP 2020 nung aliba alizüngtem ama tajungba akümtsü asoshi inyaktsüla" ta NBSE chairperson Asano Sekhose-i ashi.

"Putu 21 buba nung shisaliok ya kaketshirtem teti atema tangazükertem kümdaktsütsü,

angazüktsü jangratsü aser tanaben angazükshitsü nükjidong lir. School tekolakpurtemi competency based education angatetsüla aser kaketshirtemi kechi angazüktsüla iba nungji temulung agütsütsüla" ta lai ashi.

Iba senden nung shisalen sayurji Associate Professor, SCTE, Kohima Dr. Bendangla liasü.

Lai Role and Responsibilities of the Head of Institutions in the implementation of NEP 2020 onük jembi.

Senden tanabuba shilem nung Chief coordinator IT, NBSE-i IT dak sendakba osang lemsatep.

Pai WhatsApp group; district-wise, centre Superintendent, Financial Literacy Groups, NBSE portal, data collection software, social media (Facebook/Twitter) aser IT interventions indang osangtem metetdaksü.

Maneni, Joint Secretary (Academic), NBSE Iluheing Nsarangbe-ia NEP 2020 nung ajemdaker teinyaktsütem lemsatep.

Tanü Lok Sabha elections anogotem sangdongtsü



Chief Election Commissioner Rajiv Kumar (tiyongtsü) den Election Commissioner- Sukhbir Singh Sandhu (abelen) aser Gyanesh Kumar.nunger külemi agiba noksa ka angur.

New Delhi, March 15, 2024 (Agencies): March 15, 2024 nikonngdang 3:00 ako nung 2024 Lok Sabha election atema anogotem metetdaksütsü ta Election Commission of India (ECI)-i metetdaksüogo.

Lok Sabha election den külemi state pezü nung Assembly election agitsüba anogotem asüng metetdaksütsü ta ECI-isa ashi.

Election agitsü anogotem osang metetdaksüba sülen Model Code of Conduct tenzüktsü. 2019 Lok Sabha election nung shilem tenet lemsar April 11 nungi May 19 tashi agia liasü aser anogo pezü lir results metetdaksü.

Taküm April/May nung assembly election agitsüba state temji Arunachal Pradesh, Andhra

Pradesh, Odisha, aser Sikkim lir. Maneni taküm küm tatemlen Maharashtra, Haryana aser Jharkhand nunga assembly elections agitsü.

Ano, Supreme Court-ia Jammu and Kashmir aser Ladakh nung taküm September 30 matongdang Assembly election agitsü tetuyuba agüja lir.

Election Commissioner ana tasen shimokba sülen anogo ka lir ECI-i tanü Lok Sabha elections agitsüba anogotem sangdongtsü osang metetdaksüogo.

Taküm February ita Anup Chandra Pandey kümsük agi tonger sodi anguba aser taoba hopta Arun Goel-i kanga dang ajungbena sodi agiba sülen yashi taoba IAS officer tem- Gyanesh Kumar aser Sukhbir Singh Sandhu na Election

Commissioner inyaktsü shimogo.

Kumar aser Sandhu na shimba anema Association for Democratic Reforms-i ken o benokogo.

Supreme Court nung electoral bonds anema ken o benokertem rongnung ADR densema lir aser parnokisa Election Commissioner ana shimba sota atatsü asüngdangogo. Election Commissioner ana shimba luden nung Chief Justice DY Chandrachud medendaktsüba anema ADR-i iba ken o benoka liasü.

SC-i iba ken o ya March 21, 2024 nü angadangtsü metetdaksüogo.

Prime Minister menden ser züngsem asem luden kati ashiba nung ajemaker President-i Election Commissioner shima arur. Iba luden nung Union Minister ka aser Lok Sabha nung Leader of the Opposition adener.

Ajisüaka, March 2023 nung Supreme Court-i iba luden nung Prime Minister, Leader of the Opposition aser Chief Justice adentsüla ta ashi saka SC-isa iba atema ozüng ka yanglutsüla ta shisem.

Yaküm December ita Centre sorkari inyakyim tasen ka atema ozüng ka yanglu aser iba nung Chief Justice melena Union Minister ka adentsü latet.

Shisatsü kanga ainba putu ka nung alir: Dr. SC Jamir



Dimapur, March 15, 2024 (TYO): Tanü asenok shisatsü kanga ainba putu ka nung alir aser tarutsü anogotem kanga melenshia aotsü ta taoba Governor Dr. SC Jamir-i ashi.

Hokolbarnü St Joseph University nung 3 buba convocation sentong nung jembidang Dr. SC Jamir-i "shisatsü ya tashi aser rongsen lir aser asenok shisatsü rongsenketzüng putu ka nung alir" ta ashi.

Shisatsü aser osangtsüsang melenshiba ajanga teinyaktsü aika

melenshiogo aser terenlok maparen nung temelenshi aika nguogo ta pai ashi.

"India aser Nagaland temaba jenjang nung ajungkettsü atema kaketshirtem asoshi tanü ya mapang tajung ka lir. St Joseph University nung kaketshirtem kanga junga arantetsü asoshi ajak teperi lir. Takok angutsü atema magic formula kecha mali saka asenok tajungba akümtsü atema merangtsüla" ta SC Jamir-isa ashi.

Iba University nungi kaketshirtem shisatsü aser skills

renloktsü aser alima nung jenjang tajung angutsü tamang akar, ta paisa shisem.

"Iba anogo ajanga Nagaland aser India atema teimba tulu agütsür kechiyong degree anguba graduates-i iba reju nungi anguba shisatsü bener state aser linük renlokba maparen nung shilem agitsü" ta Dr SC. Jamir-isa metetdaksü.

Tanü graduate asüba kaketshir 1200 rongnungi gold medals angur 33, silver medals angur 32 aser doctorate degrees kaketshir 12 liasü.

School curriculum nung kaketshir indang social wellbeing inoktsü ayongzük



Kohima nung March 15, 2024 nü 'Social emotional well-being of students in Nagaland' indang workshop agidang tangokba noksa ka yangi angur.

Kohima, Metsüremi/March 15 (TYO): Nagaland nung aliba kaketshirtem den social emotional well-being indang study ka agiba sülen Bangalore nung aliba 'Dream a Dream' team-i curriculum nung kaketshir indang social well-being tali ajungketsü nüngdaker ta ashi.

'Dream a Dream' ya tajangzük mebushiba lokti tentet ka lir aser India nung tanurtem atema shisaliok melenshitsuü atema inyaker.

Nagaland nung government school tem nung azüngba kaketshir indang social aser emotional well-being metettsü aser item dak kongshiba contextual factors aser kaketshir

indang 'social and emotional skills' atema tesayur aser tsürabotem tangatetba metettsü mechi iba study ya agia liasü.

Iba sample study ya 2022 küm Mon, Zunheboto, Mokokchung aser Kohima district tem nung agia liasü.

Directorate of School Education, Kohima nung Hokulbarnü state level

"Workshop on social emotional well-being of students in Nagaland" (Findings of Need Assessment Study) alidang 'Dream a Dream' nungi Dr. Sreehari Ravindranath aser Dr. Joseph Thomas nati parnoki bushitetba aser recommendations ya agüja liasü.

Emotional well-being, personal well-being aser resilience amala nung kaketshir temi score tajemba angu, anungji tebilemtsü ka adokba sayur, ta iba study yagi bushitetba liasü.

Social and Emotional Well-being indang sub-skills nung autonomy, khuret abenba, emotional regulation amala nung score tamajungba liasü.

Self-awareness, social awareness aser emotional management amala tebilemtsü asoshi khuret abentsü nüngdaker, ta tesayurtemi ashi.

Kaketshirtem ain adokba tatalokbatem ajangshiba indang kaketshir temi ashi.

(Maneni tapak 8 nung...)

Kohima, Mokokchung aser Niuland nung DPDB senden amen

Dimapur, Metsüremi/March 15 (TYO): Kohima District Planning and Development Board ita shia amenba senden March 15, 2024 nü Kohima nung aliba DPDB Hall nung mena liasü.

Iba senden nung Advisor, School Education & SCERT, Dr. Kekhrielhoulie Yhome aser MLA Dr. Tseilhoutuo Rhutso nung dena liasü.

Deputy Commissioner, Kohima, Kumar Ramnikant-i taoba DPDB senden nung lemtetba tem lepa reprangshia liasü. Iba sülen society balala registration indang jembi aser registration atema society tenet-i asüngdangba nungi pezü magizük, aser Merhü Welfare Society, Medemer Fund Society aser Tamlu Böhü Union Society tem register asütsü atema jembia liasü.

Society ka nung züngsem tenet bosa alitsüla aser kin

balala nungi alitsüla, ta Dr. Rhutso-i ashi.

Society registration atema screening process asoshi jembidang Dr. Yhome-i registration maparen tajungba nung inyaktettsü asoshi guidelines aser criteria tejangja kar ayutsü nüngdaker ta ashi.

Kohima district nung gari license aser registration indang osang Regional Transport Officer, Kohima ajanga PowerPoint nung agütsüdang, tang fiscal year atema Learners Licenses 3580 aser Drivers Licenses 2747 agütsüogo ta ashi.

Züngsem temi road safety awareness aser registration maparen tongmelangba akumtsü atema jembia liasü.

Senden nung Divisional Forest Officer, Kohima ajanga Nagaland Forest Management Project aser Self-Help Groups

(SHGs) inakyim indang osang agüja liasü.

Maneni National Clean Air Program aser Kohima nung vertical gardens amenoktsü indanga jembi.

Dr. Kekhrie-i loan junga amshitsü aser mapang shidak nung menoktsü nenshia ashi. Taruba DPDB senden nung Public Health Engineering Department dang Jal Jeevan Mission indang PowerPoint presentation agütsütsü nungloksü.

Mokokchung District Planning and Development Board ita shia amenba senden March ita asoshi Deputy Commissioner, Mokokchung indang Conference Hall nung March 15, 2024 nü mena liasü. Iba senden ya Deputy Commissioner aser Vice Chairman, DPDB, Thsuvisie Phoji lenisüba kübok agi.

(Maneni tapak 8 nung...)



Deputy Commissioner & District Election Officer, Mokokchung, Thsuvisie Phoji-i District Level Master Trainers, Assembly Level Master Trainers aser Master Trainers for EVM tem den senden amenba mapang tangokba noksa ka yangi angur.

Atsüapong mejangjaba nisungi Aotsür subotsü agitsü memelar: Watsü Mungdang

Dimapur, Metsüremi/March 15 (TYO): Osang kaket aser media balala nung tesasatsüka sobaliba dak maketba aser yimya, atsüapong mebeteterem kari Aotsür akumtaket subosolemtsü sensamasaja yimjak nung suboba ngur Aoli Watsü Mungdangi Kanga sashia aitsür, ta Watsü Mungdang tir S.

Arenla Longkumer aser tongti zülur Sungtiriben ajanga sangdong ka nung ashi.

Asen tsürabur mapang nungi tetsür, tebur subosolemtsü bentet-benteta subosolema aru. Anungji atsüapong mejangjaba nisungi Aotsür subotsü mezüingmeshia agitsü Watsü Mungdangi memelar, ta sangdong ajangasa ashi.

Naga United Village nung SBI branch ka lapokogo

Dimapur, Metsüremi/March 15 (TYO): SBI Managing Director, Northeast Circle, Vincent Menachery Devassy-i March 15, 2024 nü Chümoukedima district kübok Naga United Village nung State Bank of India indang branch ka lapokja liasü, koba northeast circle nung branch 814 buba alitsü.

state nung bank maparen shilem 60 dak tema SBI ajanga inyaker, aser ibaji ajanga state aser national development atema SBI ajanga bendanga agütsür inyakba sayur, ta pai ashi.

Iba branch ya ajanga mutual funds, insurance aser credit cards amala facility agütsütsü, ta ashi.

Iba branch tasenba ya yangi rongsenketzüng terenlok asoshi temelenshi arudaktsür ka ama alitsü, ta Managing Director Vincent-i ashi.

Nagaland nung SBI branches 72 lapoka lir aser

EAC Chümoukedima, Kevethito Rose-i nüburtem dang bank den amalitep akatsü ayongzük aser SBI dang mapang shia Financial Literacy camp tem ayongzüka akatsü ajungshia liasü.

Advisor Ikuto Zhimomi-i Coffee Washing Station ana semzüktsü



Dimapur, Metsüremi/March 15 (TYO): Advisor, Land Resources, G. Ikuto Zhimomi-i March 15, 2024 nü coffee washing station ana semzükja liasü.

(NEC) ajanga senotsü teyari agüja amenokba alitsü.

Iba sentong nung jembidang, iba facility ngutetba atema Gariphema Village ya tia takatiba yimtsü ka lir ta ashi.

Mezüngbuba nung pai High Court Tsiesema, Kohima anasa Naga Tribal Coffee nung ka semzüktsü.

Iba sentong nung jembidang Advisor-i business tila nungi tenzüktsü nüngdakba indang shia liasü. Coffee business startups atema plantation menügdaker, ta pai ashi.

State nung coffee entrepreneurs tulu toku lir aser ana dang pei indang plantations lir, ta pai ashi aser global market nung Nagaland coffee ajanga takok anguba indanga jembia liasü.

Aluyimer tenüng nung pai Commissioner & Secretary aser Department nung ketdangsurtemi meranga inyakba atema pelaba lemsatepa liasü.

Chief Minister Neiphui Rio lenisüba kübok sorkari aluyimer nem temulung agüja Agri nung amenoka aliba machinery balala amenoker, ta Advisor Ikuto-i ashi.

Alima nung sen timtiba yokzükba crops tem rongnung coffee ya ka lir, aser state sorkari coffee tsünür nem temulung agütsür, kechiaser alima nung market avenue jenti lir, ta ashi.

Küm ishika tsüngta coffee indang market value ya sen crore 236 shi akumtsü, anungji zünger mapa mangu aliba lanurtemi business temulung agüja inyaktsüla, ta Advisor-i ayongzük.

Iba sentong nung Director, Land Resources Department, Albert Ngullie menden liasü aser P. O. V. Vikugha Sema-i melepzüng o jembi.

Maneni kasa anogo Advisor Ikuto Zhimomi-isa YES Agro Park, Gariphema Kohima nung coffee washing station ka semzükja liasü. Project anaprong ya North East Council

Ajidang masü Nagaland nung organic coffee adoker, kong chemical mesüra pesticides mali, ta pai ashi.

Pai aluyimer tem dang meranga inyaktsü aser coffee tajung züsentesü ayongzük.

Iba sentong nung Director, Land Resources Department, Albert Ngullie menden liasü aser teyari angurtem tenüng nung Vibeiletuo Kets-i o tatsüka jembi, Keduolhoukho Kire-i temeja ken ka aten aser Dr. Menuosietuo Tseikha-i melepzüng o jembia liasü.



March 15, 2024 nü Rajghat, New Delhi nung Bhutan Ato kilonser Tshering Tobgay-i Mahatma Gandhi nem akhüm agütsüdang tangokba noksa nung angur.

SC-i SBI dang electoral bonds osang tejangja sangdongtsü tuyur

New Delhi, March 15 (Agencies): State Bank of India (SBI)-i electoral bonds scheme osang tejangja mesangdongba atema Supreme Court-i aitsüogo.

Supreme Court-i SBI dang osang tejangja sangdongang, talisa tenla agütsür aser yimtenren party na tsüingda tesendaktep sangdongang, ta tuyu.

Electoral bond scheme ya ajanga tenüing memetdaksüi yimtenren party tem nem tenla agütsütsü atema nija aser businesses dang melaa liasü, ajisüaka iba maparen teladak süa meinyakba atema ashishir. Taoba ita SC-i iba scheme anentsüogo.

Election Commission-i temepishiba shidi ka agütsüba nung ajemdaker Supreme

Court-i SBI dang electoral bond osang dang masü saka electoral bond numbers-a sangdongang, ta tuyu.

Chief Justice DY Chandrachud-i aniba bench-i electoral bonds dak sendakba osang ajak sangdongtsüji kanga tongtibang, ta metetdaksü.

Electoral bonds alizükba anogo, alizüker tenüing aser denomination sangdongogo, ajisüaka Supreme Court-i SBI dang kechiba electoral bonds (unique alphanumeric numbers) mesangdong?, ta asüingdang.

Supreme Court bench-i SBI dang, nenoki züingdokbaji (numbers) metongshiang aser tesüiba küm pongu tsüingda electoral bond transactions indang osang tejangja agüjang, ta tuyu.

Iba ken o angadangba

mapang Chief Justice Chandrachud, "Shibai State Bank of India atema jembitsür? Parnoki bond numbers magütsü. State Bank of India-i ibaji sangdongtsüla," ta ashi.

Iba dak sendakba nung March 18 nü kasa ken o angadangba mapang nung ibaji asüingdangtsü atema court-i SBI jaokogo.

SBI indang affidavit ajanga ashiba agi, April 1, 2019 nungi February 15, 2024 anogo tashi nung bonds 22,217 alizüka liasü.

Tamalen SBI-i electoral bonds osang sangdongtsü atema Supreme Court dang June 30 tashi mapang meshisema liasü saka SC-i temepishibaji magizüki March 12 tashi nungbo electoral bond osangji Election Commission nem agüjang, ta tuyua liasü.

Lok Sabha election nung VVPATs ajak azüingtsü Congress-i akhanger

New Delhi, March 15 (Agencies): Lok Sabha election agitsü joko mapang ana nung lia Congress party-i Voter verifiable paper audit trail (VVPAT) ajak azüingtsü takhangba agütsü.

Hokolbarnü Congress Tir, Mallikarjun Kharge-i, vote azüingba mapang nung Voter verifiable paper audit trail (VVPAT)-a ajak azüingtsüla, ta metetdaksü.


Tawa Congress lenir Rahul Gandhi-i, taruba election nung

EVMS (Electronic Voting Machines) masü saka ballot papers amshitsü nüburtemi akhanger, ta jembiba dak sendakba nung osangbenertemi asüingdangba ka langzüdang Kharge-i, "Tetenzük nungi iba ya onok takhangba lir. VVPAT ajak azüingtsüla, ibaji onok takhangba," ta ashi.

"Nenoki VVPATs kar dang azünger, saka onoki VVPAT ajak azüingtsüla ta akhanger. Ibaji melamela metettsü aser iba nungji sen aika meindoktsü," ta

pai ashi. VVPAT ya independent system ka lir aser iba ya EVMS den sendaktepa dang lir, koba ajanga vote agütsürtemi parnoki agütsüba vote ji repringshitettsü.

Vote agütsüba mapang nung serial number, tenüing aser candidate indang temaitsü keta aliba slip ka ajenzüker aser second tenet shi transparent window nung sayuba sülen ajenzükba slip ji pasasa mejepzükter VVPAT nung aliba sealed drop box nung tsüker.



Jalandhar, March 15, 2024: Ramadan temeshi ita mezüing anogo nung Jalandhar nung Muslim nungertem mosque ka nung sarasademdang tangokba noksa nung angur.

Tanü EC-i Lok Sabha election agitsü anogotem sangdongtsü

New Delhi, Metsüremi/ March 15 (Agencies): Honibar nikongdang 3:00 ako nung Election Commission of India (EC)-i Lok Sabha election aser state Assembly elections agitsü anogotem sangdongtsü.

Lok Sabha elections dak alia taküm April/May ita nung Andhra Pradesh, Arunachal Pradesh, Sikkim aser Odisha state tem nunga assembly election agitsü.

Election Commission-i ayongzükba osangbenertem senden agibaji ECI indang social media platforms nung live sayutsü, ta EC-i metetdaksü.


Taruba Lok Sabha election nung BJP-i aniba NDA teloktep den tokteptsü atema opposition party 20 dak temai

INDIA teloktep tenteta lir. 2019 küm Lok Sabha elections nung BJP-i aniba NDA teloktepi menden 543 nungi menden 353 tashi nung takok nguteta liasü.

2019 küm Lok Sabha election agitsü atema anogotem March 10 nü sangdong aser April 11 nungi May 19 tashi nung shilem tenet lemsar election agiba sülen May 23 nü vote azüing.

Tang Lok Sabha kümsük ya taküm June 16 anogo nung tembangtsü anungji iba anogoji matongdang sorkar tasen tentettsüla.

Taruba election nung BJP-i aniba NDA-i menden 400 dak tema nung takok angutsü nükjidong yur tokteptsü aser Opposition teloktep 'INDIA'-i parnok anema tokteptsü.



Tamalen tangokba noksa nung ya New Delhi nung aliba Jawahar Lal Nehru University campus nung Admiral (ret.) L Ramdas-i kaketshirtem den jembidang tangokba noksa nung angur. Taoba mapang Indian Navy chief Admiral (ret.), L Ramdas Hokolbarnü (March 15) Hyderabad nung aliba military hospital ka nung süogo.

Citizenship Amendment Rules anema temepishiba ken o SC-i angadangtsü

New Delhi, March 15 (Agencies): Centre sorkar dang Citizenship Amendment Rules, 2024 mapatong benokba soita atatsü atema tuyutsü asoshi mepishiba ken otem angadangtsü atema Supreme Court-i melungogo.

Citizenship (Amendment) Act, 2019 ya linük temzüng alema lir, ta shia iba ozüing anema Supreme Court nung temepishiba ken otem benoka lir; item ken otem mangadang tashi iba mapatong soita atatsü atema tuyuang, ta Supreme Court dang mepishi.

Chief Justice, D Y Chandrachud aser justices- JB Pardiwala aser Manoj Misra nungeri akümba bench-i Indian Union Muslim League tenüing nung senior advocate Kapil Sibal-i benokba ken oji angadangtsü melungogo.

Sibal-i Supreme Court dang, kodang bendang linüktem nungi arur Hindu nunger nem senso agütsüdir ibaji joko tanaben magientettsü, anungji temepishiba ken otem ya tangsa rongdak süa angadangtsü nüngdak, ta ashi.

Chief Justice-i, "Onoki iba ken o ya taruba Mongolbarnü angadangtsü. Ken o 190 dak tema benoka lir. Item ken o ajak angadangtsü," ta metetdaksü.

Centre sorkar tenüing nung

jembir Solicitor General, Tushar Mehta-i, temepishiba ken o 237 lir aser anendaka aliba ken otem rongnung interim applications pezübo CAA Rules mebenoktsü atema mepishiba ken otem lir, ta metetdaksü.

Centre sorkari Citizenship (Amendment) Act, 2019 mapa küma benoktsü sangdongba sülen Supreme Court nem temepishiba ken otem agütsür.

Indian Union Muslim League-ia Citizenship ozüing anema court dang temepishiba ken otem mangadang tashi Muslim nunger anema meinyaktsü tuyuang, ta mepishia lir.

CAA kübok Pakistan, Afghanistan aser Bangladesh linüktem nung reshikangshi ajanga 2014 küm December 31 anogo tashi nung India-i arua jenoka alir Hindu nunger, Sikhs, Khristan, Buddhist, Jain mesüra Parsis nunger nem linük senso agütsütsü.

CAA kübok Muslim nungertemibo India senso memeshitettsü.

Brihostibarnü Union Home Minister, Amit Shah-i, "CAA ya kodanga tanaben magientsü. Asen linük nung India nunger senso agütsütsü atema onoki telemeteba agiogo aser onoki iba atema kodanga atsü-anem masütsü," ta metetdaksüogo.



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 16, 2024

Talirtem temeten

Yashi March 15 ya alima ajunga nung "World Consumer Rights Day" mungogo. Consumer ta asüba English ojang ya dokan nung osettsüset aser chiyongtsü alir nisung mesüra sen agütsür mapa inyadaksür mesüra yaridaksür nisung dang ajar. Anungji, consumer-ji alima nung talir temang ya asütsü, kechiyong shinga dang kecha mali, magi aser metenyaba nisungbo alima nung mali, anungji iba Consumer Rights anogomung yabo alima nung alir ajaki kanga reta amungtsüba amungba ka lir. Nisung ka nungdak angati meshiba aser angati anguba asoshi kecha balaka temeten mebushir saka sen agi aliba oset, chiyongtsü aser nübo ajakji sen dak alang shitak aser tajung asütsü tim. Tanü asüng balaka kidang mena yur bendanglen nungi online nung pei nungdak ajak alir, anungji tonga maru tashibo osetji tenük agi anguba ama shitak tajung asütsü asü masütsüar mejangjatet rataseta atar. Iba ama osetji shipoker aser tarak keter atong nungbo koda ? Mesüra tenük agi anguba ama masü tamajung ka yok nungbo koda ? Ibaji dang masü asenok aenlen jajadang bus ticket alir ser nung bus mao athi mesüra tayimtsü ticket alir ser nung mao athi ta tenchi dang koma asütsü ? Item timtem aser takoksa atema temenok meshitsü temeten lir mali ta jangjatsübjaji asenok talirtem ajak asoshi kanga tongtibang lir. Aji oda, temeten liaka asenoki memetetra tachitsü tajung aleper agütsü ser nung lapoka mechitet amato asütsü. Ashiko asen lima nung asenok nungdak bushia alidak anogo shia ajuruba timtem aser takoksa kaji seret matu aser meshitak agütsüba ya asütsüa akok. Ajakibo meinyaktsü saka aiben shi alidak seret matu agütsüba indang kanga jembir aser atangji aji tezudangtsüka lir. Iba ama mapang nung talirtemi tayokertem dang tanaben jungjunga oshitsü mesüra seretji tendangtsü mesüra yimten dang ashitsü asoshi temeten aser teinyaktsü meteta alitsü nungdaker. Kasaji, tayokertemi karibo chiyongtsü tajung o majung na meyokteper ayoker. Ano, karibo company-i ajenloker yokba jenjang shitoker ayoker. Ano, tamajungtibaji tachitsü aser tajemtsü atema mapang süir ser nung odang ayoker. Ibaji talirtemi kecha balaka süoki ia mebilemra aser mereprangra, tayoktemi pei ajangzüksü merangdang talirtembo senotsü nung dang masü saka temang nunga dena tashidak kaotsüsa akoksatsü. Taküm iba alima Consumer Temeten anogomung omen ya Consumer atema shitak bilemja inyakba Artificial Intelligent, 'Fair and responsible AI for Consumers' ta shimteta liasü. Atangji, tangbo nisungi seret orr agütsütsü mesüra nisung teben agi tendanger agütsütsü masü item mapa ajakji machine agi dang Artificial Intelligent ajanga dang inyaktsü, anungji tayoker o talir naji nisung o nisung na jembitsü masü saka aiben talirtemi machine den dang jembitsü . Kasaji chiyongtsü aser mozü yangluba aser agütsüba mapatem ajak Al ajanga machine agidang inyaktsü. Iba putu nungji asenok liadokogo, anungji asenok talirtema tayokertemi ayokba oset, chiyongtsü aser nübo ajakji tali langa amshitsü aser achitsüsa asenok dak temetetba alitsüla. Akhidang nungi tashitemetet dak tashi lir, Knowledge is Power, ta asüba ya kangasa shitak lir. Asenoki asen temeten meteta lira, tangari asenok akhümtsübur aser mashioktsür. Iba tangatetba nung 1963 küm nungi küm shia alima ajunga nung iba Consumer Rights anogomung munga Consumer Rights indang jembia amunger. Ashiko, asenok state nungbo tesem aika nung iba angomung indanga memeteti süitemdaksür alitsü. Ajisüaka, Consumer Right nungji government mapa nung alirtemia asenok nübortem amajok nung rongsen aser nübo endoka mejajadaksüi mapang shitak nung mapa shitak renemer agütsütsü tim, aji consumer right asütsü. Iba consumer right indang angatetdakja consumer-tem tashi aser tasü itdaksütsü asoshi mapang shia state aser district level nung Consumers Forum aser Commission mesüra Legal Authority purtemi sentong tajung agitsü kanga nungdaker.

OLEMSABANG

Ali agi Nisung, Long nungi Tzü

Süpongñungsang Longkümer
Darogapathar Dimapur

Alima aser yangji aliba aser anüng temalen anü Ita aser petinutem asatangertemi pushitetba rongsen agi shishilembar tashi temetetter aika lir. Parnok ajanga tsüngküm mongpu melenshiba, tanü aser asüng mesüra küm nung kechi ataloktsü aji metetdaksür saka aji khen yuja atar otsüla obuola nunger liyonga aruba nungi tanü tashi koda liyonga arur tatsü agi lemsatepnür.,0000 AD tejaklen nungi nokden tsüngden arüjem mapang nung tajem densa liaka yimtsüng ka alushe tulu tila yari buok kaji küm 18 mesüra tali-a wazüka ayu anungji iba lu küm tatazük dangji machilu ta aja ano buok kar lepbok dangbo kibong aika alirbo küm mapensa achitsüsa akümer anungji iba lu dangji lanulu ta aja aser iba kümsükji küm 9, mesüra talia adoker. anungji buok ka küm yamaji ayu dangbo süngushe agi ali temu kanga akümba agi aluji ai masak inyaktsü temela aser tsük kangasa aro anungji taka taitertemi jen tulu talang ana asem tsük agi sünga dokden pentenba agi Nashe aser Sü jia shisang shisanga lipalirua aru, iba denji ansutsü mersü , repje, mapo, Menti, züngei alu nungi adokba agi anüngaponga mekae lia aru. Kisü jensü mapang meta talangi moe süngküm pena arutsü atema, mesüra kitsük kirong mapang ajongpen süngküm dangtsü atema kirtsüng nung süngküm ajak watetta ayu anungji iba lim tangji süngwa ta ajar. Tsürapor mapang bei süngwa nung saka shingaia kidong mesüra kin tambo dang masüngtange yoka dak alaka süngküm ka lepzüksü mekoke litepba aru. Anungji tongtipangsa kitsük kirong mapang nung bei süngwa nungi tekaratiba nung süngküm pentena kironger kiji yanglutsür jenokdaksü. Iba ten külemi kir meketta süngwa aliba ajanga aser Yimtsüng shia arür nungi kümzüksü atema tip külenposa kong longren longbanglitir yangji yim küma libalirua aruba ajanga tzü agi kangapo manünge aser moponga tajung liasü. Kodang Mokochung Town renlok tenzük kisütsü süngküm aser tatsüktsü süng aser lenmang aser ki yanglutsü asoshi long shipelentsü tenzükba tanüpo arem ajak moapu aser longren longbang ajak kaktama aoba ajanga tzü rusepba kümaogo aser süngtong maliba ajanga mopong tajung mali Kechaser longren longbang pulua alidak tzü jendi adoker aser arem junga alidak ali temo adoker aser mopong tajung angur. Tsüngküm nung saka Süngdonglidong dak tzü kanga yinra tsüngküm nung asüyonga süngdonglidongji tira aser kanga ainür, ali nungi tzü adoker ta ashitsü akok saka ali nungi tzü adokra idakji anentsü anener. Anungji tzü aser mopong tajung angutsü atema longren longbang aser süngdonglidong wazüka ayutsü merangtsüla. Shingaia Sen agi periogo ta kodanga mashitsü mesüra mataloktsü. Utrakhant tenem len Nanital city ya longren agi meketbanga lir aser City tiyong nung awatsü tuluka 95 ft tarok lir ta angazüker aser iba nungji ayong tila asem shi yimoker aji tang masü longren ajak nungi tzü temerük jangratemtsü ka ayimer. United Arab Emiret (U A E) ya lisem lima anungji tsünglu khen khen terara aruba agi ali memetenrar anungji lenmang tezü nung kilentzü khen agi meyanglur saka takar lima asünung parnokki mepet atsür alua tayimtsü ajanga tsünglu tsükdaksütsü renem aser yamaji tzünglu kanga sashia tsükdaksü saka kilentzü makaba ten Tsüngrem sentong masü asünung tzümetsüng tulu arua alima kanga mejunge raksaba yaküm küm tashi atalok ta angashia liasü.

Asen Aor lima ya kü tangatetba ama masütsü-a akok saka nibo, tangar lima ten metemtangra khen agi palaka jangratemtsüka ta angatetter. Kechaser nisung mesenzütsüsa longren kanga tamajungpo aisü mali timba ka nung alu ayimtsü junga lir. SakaSensaker atema (BPL) ration card jang ya kodang anentsü ashitsü makok saka iba dak metaloker alu mayimer aika lir anungji iba dak metaloker alu mayimba ya tamashibo mesüluma ta bilemer. Asenoki alu ta sürabang tsük lu tang bilemer saka aluji tapu aisü nungi ayimtsü akok saka Truck load apensa inyaktettsüla sürabang shipelentsü tasak masütsü südi. Asenoki inyaktetba osettemji kari pelendoktsütsü akok saka oset jagi Truck load apensa nung tang shibelener asoshia lenmang angutsü. Saka Truck load mapensa tashi penür motettsü. Aor lanurtem politician dak memetaloke bei jangraba mapa inyaktetra shibelentsü lenmang pasasa lapoktsü mapangi penür arutsütsü ta imlar. BPL card ten AAdar card sendakteptsü jembir süra sensakertemji AAdar mekara jang mangutsü. Takartem aser tulurtem BPL card ten AAdar sendaktepnü AC number jagi BPL cardji koda asütsü, aser Ration card ten AAdar sendaktep jagi kechi sayur ta asüngtangtsü mapang adonger. Asen Ao lima nungpo Train lenmang lapokti asünunga kangapo tasak mesüluma ta bilemer. UP len Locknow nungi Gatkudum tashi Train engeene ana agi atsür atur aser ilen nungjagi chiyongtsü peria penür arua shishilembapa angazüker. Tanü asüngbo aseni jamgraba inyaktsü lenmang aisü nungi angur amai ajitetter. Anungji mapang indoka tamakoktsü lenmang matae mulungtetta tenzük nung jungtisü ta ayongzüker. Nisung taküm ya ali agi yanglu aser Tsüngrem tangula apuoktsü, ali anaka inyaktsü nisungi aatet iba taküm tzü medene alitsü makok anungji long nungi taküm tzü poktetdakja pai mesür . Anungji pa nungi shisatsü agia jajatsü Tsüngremi asenok dang akanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Assam nung Khristan 25,000 dak tema adenshia sarasadem



March 14, 2024 nü Assam kübok Udalguri district nung Christian Coordination Committee-i ayongzüka sarasadem sentong agidang tangokba noksa nung angur.

March 15, 2024: Assam nung Khristantem anema inyakba anema Khristantem lokti senden tuluka agitsü atema ketdangsertem dang temelaba meshia liasü, saka ketdangsertem temelaba magütsüba sülen Khristan 25,000 dak tema adenshia sarasadem sentong ka agi.

March 15, 2024 nü osangbenertem den jembidang Assam Christian Forum (ACF) nung otongdar, Allen Brooks-i, "Kodang ochi temeden magütsüliir Tsüngrem dang tashi aser leniba meshia sarasadem," ta ashi.

Paisa, state nung ruling party BJP-i Khristantem tebilemtsü onük balala atema telangzüba magütsüba agi Khristantem sarasadem sentong agitsü telemtetba agia liasü, ta ashi.

Christian Coordination Committee-i sarasadem sentongji March 14 nü Udalguri district nung aliba Nalbari playground nung ayongzüka liasü aser iba sentong nungji Khristan denomination balala nungi züngsem meyrjang aika arua aden.

Boro Baptist Convention kübok Church Growth Department nung Secretary, Rev. Susil Daimari-i, state nung yimjung aser tesünep nungdak, ta ashi.

Khristantem lokti senden tuluka agitsü atema ketdangsertem dang temelaba meshia liasü saka temelaba magütsüba agi parnoki sarasadem sentong ang ayongzüka agi.

Allen Brooks-i, Assam nung Assam Healing (Prevention of Evil) Practices Bill, 2024 oziung agizükba aser telok kari Khristan rejutem anema inyakba anema state nung Khristantem longjemer, ta metetdaksü.

Assam nung Assam Healing (Prevention of Evil) Practices Bill, 2024 ya ajanga Khristantem sarasadem sentongtem nokdangtsüa akok, kechiyong sarasadem sentongtemji sayatenya agi aneptsüba sentongtem lir, ta tai tongloktsütsüa akok, ta Khristantem bilemer.

March 14 nü agiba

sarasadem sentong nungji Catholic, Baptist aser Church of North India nungi züngsemtemi shilem agi, aser iba sentongji ajanga sorkari onoki ayimdenba ola angashitsü imlar, ta Allen Brooks-isa metetdaksü.

Taküm February 7 nü Hindu teloktemi state nung aliba missionary school tem dang school nung Kangki densema Khristan temaitsütem agienang, ta tuyua anogo 15 züngzüka liasü. Anogo 15 ji tembangba sülen Hindu teloktem jagi legal tsütsülen nungi Khristan school tem anema inyaktsü, ta amokmerenogo.

Hindu telok jagisa Khristan putirtem aser nun tem dang yimsü dak sendakba sübotsü masü saka civil dress dang agitsüla, ta tetuyuba agütsü.

State nung Khristantem anema inyakba kanga bulua atalokba sülen Khristan teloktemi Assam Chief Minister Himanta Biswa Sarma dang teyari meshi saka sorkari telangzüba magütsüba agi maneni Khristantem state Angh dang teyari meshiogo.

March 11, 2024 nü United

Christian Forum (UCF) nungi züngsemtemi Assam Angh, Gulab Chand Kataria ajurua tebilemtsü onük balala lemsatop.

February 17 nü Assam nung bus ka nung nun ka mezüngmeshiba sülen bus nungi meindoka liasü.

March 2 nü Mayong sub-division kübok Jagiroad nung osangbenertem senden ka nung Hindu Yuba Chattra Parishad (Hindu youth students' council)-i sorkar dang Assam nung missionary school tem ajak shibangjang, ta takhangba agüja liasü.

Sarasadem sentong ayongzükertem, sarasadem sentong nung Khristantem kanga longsoa adenbaji ajanga state nung Khristantem tebilemtsü akaba temaitsü sayur, ta metetdaksü.

Sentong ayongzükertemisa, sarasadem sentong ajanga kin balala aser oshi balala jembirtem; talisa Boro, Adivasi (tea tribes), Santhal, Garos, Rabhas, Nepali aser Assamese nunger Khristantem longjemdaksüogo, ta metetdaksü.

Russia nung South Korea nunger missionary Baek Kwang-soon apu

March 15, 2024: South Korea nunger Khristan charity ka atema inyaker missionary, Baek Kwang-soon-i itdangitba mapa inyaker, ta tai tonglokja Russia nung puogo.

Khristan melungtet telok Global Love Rice Sharing Foundation nung tongti, Lee Seon-gu-i, Baek Kwang-soon apuba ya yimtenren tsütsülen nungi lir, ta aitsü.

"Iba foundation yagi North Korea nungi jena arur Russia nung jenoka alirtem yarir, ajisüaka North Korea nung alirtem dang linük toktsür ajentsübo onoki majungshir," ta Lee-i metetdaksü.

Lee-isa, Russia-i tiyazü nung missionary Baek nem tai tongloktsüba ya yimtenren tsütsülen nungi asütsüa akok; pa tekara nung chiochtsü atema onoki inyakdar, ta metetdaksü.

"Ozü sorkari (South Korea) Ukraine pusemba, nüchiso aser democracy pusemba ajanga Russia-i onok mangyanga inyaker asütsüa akok. Onok pastor tem aser missionary tem itdangitba mapa inyaktsür südi, ta Russia-i temelung malemer asütsüa akok," ta Lee-i ashi.

February ita tatembanglen Baek apuba sülen Moscow nung aliba Lefortovo detention facility nung puoka lir, ta March 11 nü Russia ketdangsertem metetdaksü.

Russia nung aliba court kati March 11 nü ken o angadanga sülen maneni June 15 tashi pa mechioki alitsü tuyuogo.

Russia nung ozüng benokba agency kati taküm küm tetenzüklen Russia kübok Vladivostok yimti nung missionary Baek apuba sülen maneni bushisüngdangtsü

ANOGO ABEN TSÜNGREM DEN

Tarezmük agi angazükba

Kü adianutem, kodang nenoki tatitang aika angur, nenok tamang atitangba agi tarezmük adokdaksür, ta metetta aji kanga tepelatsü ta züngshiang. Aser nenok kecha nunga manüngi teperi aser tabensa akümtsü asoshi, iba tarezmükbaji pei mapa teperi südakjang. Yakob 1:2-4

Asenok taküm nung tetentangba indang tongtipang osang ka agütsür. Tamanger dangi tatitang aruba ajakji Tsüngrem temelaba nung arur. Tsüngrem temetebaji shingai paidoktsü makok. Pai pa nübur dang inyakba Laishiba ajanga asenoki anguba ama asenok dangi aruba tatitangji Tsüngremi meteta lir ta asenoki agizüktsüla. Yakobi ashibaji tamakoktsü amai bilemer: asenok dangi tatitang aruba nung pelaang. Tepela aser tatitangji tamamangtsü ka ama bilemer. Asenok pelaa lira tatitang malitsü ama asenoki bilemer. Saka kasa taküm ka nung kasaji alitsü ta Tsüngremi ashir.

Kodang asen taküm nung Tsüngremi anishiba agizükdir, iba yagi tetsübu aser mejangjaba nungi kümzüker aser tasü itdaksür, aser "temoatsütem züngdangtsü" tasü itdaksür. Ibai tajungshiba ka dang masü, saka ozüng ka lir. Ano ozüng jagi tatitangba nükjidong aser iba nungi adokba metettsü ashir. Tatitangbaji tejangja kulitem asoshi yoker. Tatitangba marudang tama Tsüngrem sendong tejangjang ashiba angur.

Asenok atitangbaji tabensa aser terenem kümdaktsütsü Tsüngrem nükjidong lir. Temenen makai tabensa akümtsü indang o jagi mashir, saka tain kümdaktsütsü indang ashir. Kibuba Yisu Khrista tabensa lir! Kü leman nung tatitangba arudang iba nungi angazükdang Pa taküm kü dak ainer. Tatitang aruba shia ni Tsüngrem dang nai kü dangi tatitang yokba asoshi "ne tenüng asanger" ta shitettsü asü? Ni tain kümdaktsütsü asoshi pai ya yoker ta angatetra ni "ne tenüng" asanger ta shitettsü. Pa sentongji tabensa tetentangbatem lir ta ni angatettsüla aser amangtsüla, koba agi ni ainba peria kümdaktsür. Kü teyari ajak ni Khrista nung angur aser idakji meperiba mali ta tatembangji südaktsütsüla.

Kü teinyaktsü peria indaktsütsü asoshi tarezmüki kü taküm nung mapa inyakdaksütsü. Tanur ka tarezmük den masor saka tsüraburi angazükdakja indaktsür. Idangji pai shidakba tarezmükji sayutettsü. Aji oda asü nung dang pai shidakba tarezmükji sayutettsü. Kü Tsüngremi tatitang aser tetentangba ajanga angazükdaksütsü ni bushir. Ni itemji agizükdaksütsü ni bushir. Ni itemji agizüka aser kü tarezmük asütsü amshidang ni tashi itta akümer, aser Yisü mesük akümer.

Oba, kü taküm ajunga anguba asoshi ne tenüng asanger. Ni angazükba nung ni ne dak amanger, anungji nai ni shimba asoshi pelar.

atema Moscow-i anir ao. Korea nungertem South Russia nunger criminal code Korea-i aotsü atema Baek-i kübok Arrla 276 nung Baek yariba atema Russia sepaitemi anema kuli tejangja ngua pa dak tenük yok asütsüa aitsüra pa küm 20 tashi akok," ta metetdaksü.

tepuokdak ayutsüa akok. "North Korea nungi jena Lee-i, "Russia nunger, Thai arurtem South Korea-i yoktsü aser North Korea nunger aika atema Pastor (Baek)-i ROK sensakertem lir, teyari intelligence services den nungdabapur aika lir, anungji tongteprateper asütsüa akok, onoki parnok nem chiyungtsü kechiyong parnok (ROK aser süoshi agütsüba den intelligence) teyari medenibo külemi parnok den Khrista ibaji tamakoktsü," ta Lankov- osangtajung lemsateper," ta isa metetdaksü.

Khristan melungtet telok- Küm asem tejaklen Baek-i Voice of the Martyrs (VOM) Khristan melungtet telok nungji nung tongti, Eric Foley-i, adenba sülen Russia kübok "Khristan yimsü indang aliba Vladivostok yimti nung tesayuba aser sayutsüngiba dak missionary mapa inyaktsü alia tanga mapa inyakra atema pa nem lezmükja liasü. missionary temi timtem ajurur,"

ta metetdaksü. Korea Risk Group nung Director aser Kookmin Foley-isa, intelligence University nung professor, agency temi Arogo lenirtem Andrei Lankov-i, "Russian Far dang nungibo missionary taliba East nung mapa inyaker North mita repranger, ta metetdaksü.

Mediterranean tzyim nung migrants 60 shi asü

Tripoli, Metsüremi/March 15 (Agencies): Mediterranean Sea nung ngisa agi yangluba rong tilaka timtem ajuruba sülen yangji mena alir migrant 60 shi asü ta iba lendong nungi jenbur temi ashi.

OceanViking temi iba rong nung takum alir nisung 25 kumzük. Ocean Viking ya humanitarian group SOS Méditerranée-i amshir.

Parnoki parnok kumzükertem dang ashiba agi, parnok ya anogo ishika tejakdang Libyan tzyikum nung aliba Zawiya nungi abuso.

Anogo asem sülen iba rong nung aliba gol raksa aser parnok tzyüma nung chiyongtsü mesüra tzyü maka pongdaka ali.

Asürtem rongnung tetsür aser tanura ka densema lir ta kumzüka alirtemi ashi. Parnok ya tzyü nung arakseta asüba masü saka yasa-tzyüra agi asüba südi ta amanger.

SOS Méditerranée-i ashiba agi, Ocean Viking team yagi binoculars amshia Bodhbarnü rong tilaka angu aser Italian coast guards den külemi medical evacuation inyaka liasü.

Iba lendong nungi takum kumzükertem ajak tashi kanga mait aser tang temang anepaluba mapang lir ta ashi.

Parnok rongnung nisung ana süchia orr nisung memeteti tia kanga mejungi liasü aser temang anepalutsü atema helicopter nung Sicily bushia anir ao, ta SOS Méditerranée-i ashi.

Tanungba nisung 23 ya tang tashi Ocean Viking nung lir aser parnok den ano danga rong ana

nungi kimzükba migrants 200 dak tema lir.

Tang takum kumzüka alirtem ya ajak tebur dang aser 12 ano tanur lir aser parnok ya Senegal, Mali aser Gambia nungi lir ta ashir.

Ocean Viking ya Ancona rongnendak bushia aorba liasü, koba anogo pezü agütsü, saka parnok dang anasatiba rongnendak bushia aotsü shiogo.

"Rong nung timtema alirtem ya samar hopta ka jungnüa liasü aser tajemtsü tzyü aser chiyongtsü kanga kera tembang ta takum kumzükertem temi ashi," ta SOS Méditerranée odongtar kati rong nungi ashi.

"Nisungtem yamaji asü. Ni nisung ka ajuru aser pa kinungtsü aser küm ka ser tesadang kinü tanur ka iba lendong nung asü. Kinü tanur ya mezüng anogo asü aser tetsür ya anogo pezü buba nung asü. Parnok ya Senegal nungi aser Libya nung küma ana dak tali liasü."

EU indang border agency Frontex-i ashiba agi, Libya tzyükum anasa rong ka nung nisung 50 dak tema mener rong ka anguba sülen taoba Hokulbarnü osang agütsü. Ajüsüaka Ocean Viking ajanga ngutetba ngisa rong ya asü masüar parnoki mashi.

Frontex ajanga ashiba agi, par indang tayimtsü ka routine trip jajadang Libya indang rescue zone telungzü nung rong ka angu aser Libyan ketdangsür nem osang agütsü.

Parnokisa anasa aliba rong

ajunga dang teyari agütsütsü osang sangoktsü aser Italian aser Maltese rescue coordination centres nema osang agüja liasü.

Rong ya totzü inoktsü asoshi alinük bushia aotsüsa akum, anungji iba sülen rong ya kechi asüar memetet ta Frontex-i ashi.

Küm ter tejakdang nungi record bendena arudang migrant tem asoshi 2023 ya tamajungtiba küm ka liasü, kong alima tesem balala nung migration routes nung nisung 8,565 asü, ta taoba hopta International Organisation for Migration (IOM) ajanga shia liasü.

Asürtem ya 2022 küm dang shilem 20 agi timba ta ashir.

Mediterranean crossing ya tamajungtiba lenmang lir, kong 2023 küm nisung 3,129 shi asü aser sama.

Migrant temi ajangtsü merangba central Mediterranean route ya alima nung sea migration routes tamajungtiba lir, ta SOS Méditerranée-i ashir.

Taküm iba lenmang nung migrant 226 shi süogo ta IOM ajanga ashir.

Italy aser danga European Union sorkar temi North Africa nungi Europe bushia arurtem tajemba kumdaktsütsü meranga Libya aser Tunisia nem sen aser rongsen agütsür.

Italian Interior Ministry ajanga ashiba agi, taküm tang tashinung migrant 5,968 tashi par linük tonga aruogo aser 2023 küm kasa mapang nisung 19,937 arua liasü.

Palestine ato kilonser inyaksü Mohammad Mustafa shimogo



Gaza City, Metsüremi/March 15 (Agencies): Tir Mahmoud Abbas-i Palestinian Authority indang ato kilonser inyaksü atema Mohammad Mustafa shimogo. Palestinian Authority yagi occupied West Bank shilem kar nung yimsü asür.

Mustafa ya US nung azüing aser taoba mapang World Bank ketdangsür liasü aser pa ya mapang talangka tir indang adviser inyaka aru.

Pa jakdang inyaka alisang Mohammed Shtayyeh ya hopta asem tejakdang mapa yutsü.

Israel-Hamas rara temer Gaza nung yimsü asütsü atema US-i Abbas dang PA

asendenshitsu kanga ajungshir. Taoba ita Israel Ato Kilonser Benjamin Netanyahu-i iba territory atema pa mangdang lemsatop, saka yangji PA shilem kecha shia meliasü.

Hamas teloki October 7 nü Israel south tsütsü maka nisung 1,200 shi tepsetba den nisung 253 pua bener aoba sülen Israel mitkari tayimtsü amshia aser alilen nungi Gaza amaker.

Tang tashinung Gaza Strip nung nisung 31,300 shi tepsetogo ta Gaza nung Hamas-i ketdangsüba health ministry ajanga ashir.

Mustafa shimba sangdong ka tiri Brehostibarnü agütsüba nung pai anir Gaza nung

humanitarian relief mapa inyaksü aser rara mapang samar aliba tesem yanglushitsu shia lir.

Ano teinyaksü tongtipang mapa kaji tesem balala nung prokshia aliba institutions tem ka kuma lungjemdaktsütsü lir ta ashi.

Mustafa ya George Washington University nungi PhD agia lir aser 2015 küm nungi Palestine Investment Fund nung chairman inyaka arur.

Aji masüdang pa deputy prime minister aser economy minister ama küm ana inyaka liasü aser 2014 küm Israel aser Hamas tsüngta raraba sülen Gaza nung asentenshitsu merangba maparen nunga shilem agia liasü.

Mustafa shimba atema White House-ia pela agizük aser akok tashi tekeratiba nung "reformed cabinet" tentetstü ayongzük.

Palestinian Authority ya 1994 küm Oslo accords kübok tenzük aser Israel kübok maliba occupied West Bank tesemtem nung yimsü asütsü tashi agüja lir, kong Abbas indang Fatah movement tashi tulu lir.

PA yagi Gaza nung yimsü süa aru aser 2007 küm Hamas teloki Abbas tashi angaba sepaitem atsüngdokba sülen par tashi ajema akum.

Office of the Mopungchuket Ait Laishir Telungjem Mokokchung

TENÜNGSANG AGÜTSÜR

Mopungchuket Ait Laishir Telungjem Mokokchung züngsem rongnungi Sb. Imtisanen Jamir, Cadet Under Officer (CUO), Fazl Ali College aser Mokokchung nungi mezüngsa 75 buba Republic Day Youth Exchange Programme & PM Rally, New Delhi, NCC Contingent nung shilem agiba aser Tsüklai 23, 2024 Nagaland Governor nungi shilem agiba kuli agizüka khonang ajangzüketba asoshi tenüngsang agütsür.

Tarutsü anogotem nung ne taküm aser wadang Tsüngremi maneni moaja len aniang.

Sd/-
Bendangkumzuk Aier
Tir, MALT Mkg.

Sd/-
Lepokjungla Jamir
Tongti Zülur, MALT Mkg.



Office of the CHUNGTIA SENSO MOKOKCHUNG TOWN P.O. Mokokchung - 798601 Nagaland.

TENÜNGSANG AGÜTSÜR

Dr. Imtilong Longkumer, Lt. Moatemsu Longkumer & Lt. Bendanglila Jamir jabaso, lanua nungi ajemalua, nükjidong tajung akaba Chungtia senso tajung ka soteta, nübori yimlaba ama taküm nung takok tulu nguteta NPSC tatidang nung Veterinary Assistant Surgeon (Class 1 Gazatted) under Animal Husbandry and Veterinary Services Department nung asütsü shimtetba, iba takok tulu asoshi Chungtia Senso Mokokchung Town-i pa tenüng as anger. Nübor tenzükba nung iba mapa ketdangsüa apuloker aodang Tsüngrem tsübuba nung ochi shia tenzüktsü, Chungtia Senso Mokokchung Town-i sarasadema moatsür.

Sd/-
Lanusüngzük Longchar
President, CSMT

Sd/-
Imtiwapang
Secretary, CSMT

Office of the All Nagaland Taxi Association Mokokchung H.Q. Kohima, Regd. No-1251

SANGDONGER

18th - 23rd March, 2024 10:00 Am -3:Pm tashi nung office-i arua item nüngdakbatem - Driver ID Card, Membership, Token, new Registration aser Ownership yanglutsü metetdaksür.

Temalen agüja alibatem meshidaki Taxi nung passenger anir senzütsü, temesepa chia jemer passenger anir senzütsü mesüra temesepa chiyongtsü bener senzütsü kenyongi memelar. Shirnoki aibelentir temzüng nung aliba ama temerenshi alitsü. Iba dak alaka Private gari hire mesüra passenger bener senzüba metetra temzüngi melaba ama tapet temerenshi alitsü. Nübur asoshi teyari aser nüngdak balala atema teküboklen agüja aliba number nung tongteprateptsü junger.

Sd/-
Mr. K. Tongpangkoba Pongen
President, ANTAM
+91-9612292004

Sd/-
Mr. Imchayapang Pongen
Gen. Secy. ANTAM
+91-9402017004

GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA

Dt. Kohima, the 15th March 2024

NOTIFICATION

NO.DTE/ESTT-2/NEET/01/2024-25/ Intending candidates informed that the Veterinary Council of India will be using National Eligibility cum Entrance Test (NEET (UG) - 2024 Merit list for admission of students to B.V.Sc. & A.H. Degree Course from the academic year 2024-25 for filling up of seats in recognized Veterinary Colleges under 15% All India Quota.

Note: Students desirous to take admission to B.V.Sc. & A.H. Degree Course under 15% seats on All India Basis are hereby advised to appear NEET (UG) - 2024 to be conducted by National Testing Agency (NTA).

(ER. VIPULHOU LHOUNGU)
Director

Russia nung tir election tenzükogo, Putin-isa akoktsü

Moscow, Metsüremi/March 15 (Agencies): Russia nung anogo asem atema tir election asoshi Hokulbarnü vote agütsü tenzükogo, saka Tir Vladimir Putin nemsä küm trok tali yimsü asütsü tashi agütsütsü tejangja lir.

Independent media aser tejangja rights groups tem alena yur Putin nem political system

aziöktsü tashi ajunga agütsür lia election ya agir.

Ano Moscow ya Ukraine nung rara tenzükert küm asembubai mejakloka aidang election ya agir. Time zones 11 aliba linük tulu aser ozüing alema Ukraine region tem rakzuka aliba tesemtem nung vote ya Deobarnü tashi agütsütsü.

(Maneni tapak 8 nung...)

CM Rio-i 3rd NE Games 2024 indang Games Fest & Games Village semzüksü



Dimapur, Metsüremi/ March 15 (TYO): Nagaland Chief Minister Neiphiu Rio-i March 15, 2024 nü 3rd North East Games 2024 atema Games Fest aser Games Village semzükja liasü. Kingdom Culture Church, Dimapur nungi Pastor Visasier Kevichüsa-i sarasadema tenzükba sentong nung aruya aliba asayamung asoshi takok aser

temoatsü bushia nisung aika adenshia liasü. Council of Ministers aser Advisor temi meina CM Neiphiu Rio-i North East Games 2024 indang Games Headquarters semdanga liasü. Chief Minister-i iba asayamung nung shilem agitsü aliba asayartem, ketdangsürtem, volunteers aser asayamung ayonger

dang pelaba lemsatepa liasü. Games Fest aser Games Village semzüksüba ajanga Nagaland sorkari tongtibang asayamung tulu ayongtsü asoshi bendanga agütsür inyakba kuli sayur. Games Village nung facility tajung agütsüba den ki o jen tajung renema aliba ajanga asayar aser terepranger nem world-class experience agütsüsü, ta pai ashi.

Tanü nungi 52nd ASA Wrestling Meet tenzüksü

Kohima, Metsüremi/March 15 (TYO): Khuochiezie (Kohima Local Ground) nung March 16, 2024 nü nungi 52nd Angami Sports Association (ASA) Wrestling Meet 2024 tenzüksü maparen ajak renemogo. Iba asayamung nung Angami nung wrestler 60 terenemshiba tulu nung lir, aser defending champion Kezhasseluo-o Pienyü-i tayongzük balala ajangtsü renema lir. Tsükong pezü nungi iba asayamung nung shilem agitsü aser yangji Northern Angami Sports Association (NASA) nungi reigning champion Kezhasseluo-o Pineyü, Southern Angami Sports Association (SASA) nungi Atuo Tevo, Western Angami Youth Organization (WAYO) nungi Seyiejalie Gwirie aser Chakhroma Youth Organisation (CYO) nungi Keneisetuo Kire nungertem dena lir. WAYO wrestler temi SASA wrestler den melangteptsü aser NASA wrestler temi CYO wrestler den melangtepa iba asayamung tenzüksü. Kasa mapang SASA wrestlers temi CYO wrestlers den melangteptsü aser WAYO

wrestlers temi SASA wrestlers tem den second round nung melangteptsü. Third round nung NASA wrestler temi SASA wrestler den melangteptsü aser CYO wrestler temi WAYO wrestler den melangteptsü. Iba asayamung nung wrestling sapur nisung 16,000 shi arua adentsü teimla lir. Ground management maparen Angami Catholic Union nem nungloksü aser organising committee convenor Neiba Bernard Pienyü-i anir anibelem mesasai iba asayamung takok ngua tembangtsü asoshi meranga inyaktar. Iba asayamung nung Nagaland Chief Minister Neiphiu Rio ya tongti tesemdanger asütsü aser MLA Dr. Tseilhoutuo Rhütso ya tetushi tesemdanger alitsü. Iba asayamung reprangtsü atema entry ticket yamai alitsü: Donors atema sen 2000, Balcony aser Chair A category atema sen 500, Chair B atema sen 200 aser Chair C atema sen 100 alitsü. Kasa mapang ASA ajanga asayartem dang anepdang 8:30 ako nungbo iba tesem nung arua mena atatsü metetdaksüogo.

STATE OSANG : Tapak 2 nungi...

Kohima, Mokokchung aser Niuland nung...

Senden nung PWD (R&B) ajanga department inyaksangshi indang lemsatepdang lenmang tezülen long atsükba ajanga lenmang raksaba aser anentsüh aluba indang tebilemstü lemsatepa liasü. Log atsüngba, tatsüktsü süng nangtena ayuba aser sentong junga meyaglui link roads yangluba aser lenmang tezülen terenlok maparen junga meinyakba ajanga lenmang agir, ta ashi. Iba asoshi Deputy Commissioner-i nokda dener kuli bener arutsü aser timtem bentettsü asoshi mera agitsü ashi. Iba amala maparen meinyaktsü atema tekeraba nung totuyuba ka agütsüsü ta pai ashi. Department of Urban Development ajanga tang teinyakdak aser tarutsü nung inyaktü aliba prokect tem indang PowerPoint presentation agütsü. Iba

mapang parnoki PM Street Vendor's Atma Nirbhar Nidhi (PMSVANidhi) Scheme nung terenlok aliba indang ashi, koba ajanga Street Vendors nem Working Capital Loans agütsür. Tang tashinung street vendors 112-i iba scheme nungi teyari agiogo, ta ashi. Board ajangasa Chuchuyimlang HiEERA Project agizüka tim department dangi nungdakba mera agitsü asoshi yok. DC Mokokchung ajangasa Heads of Departments (HoDs) aser employees ajunga dang election mapang pei posting tesem nung alitsü metetdaksü. Niuland District Planning and Development Board senden March 15, 2024 nü Deputy Commissioner, Niuland indang Conference Hall nung Deputy Commissioner aser Vice chairman, DPDB Niuland nung Sara S. Jamir lenisüba kübok mena liasü. Niuland District atema

Project Director yoka DRDA office balala amenoktsü, Treasury office amenoktsü, Branch Post Office upgrade asütsü aser Old Showuba nung SBI Bank tali amenoktsü atema iba senden nung jembia liasü. Khaghaboto (Grey area) nung tekeratiba nung Police outpost ka amenoktsü atema iba senden nung nenshia jembia, kong küm shia nisung tepsetba ama ataloker. Board ajangasa sorkar dangi district nung department balala 12 amenoktsü asoshi bena liasü. DC ajangasa district nung aliba ketdangsürtem dang station nung alitsü aser station yutsür aotsüsa süra leave agütsüsü ashi. Iba senden nung Food and Civil Supplies Departmental nungi ketdangsür temi inyakyim PowerPoint presentation agüja liasü.

BENDANGLI OSANG : Tapak 7 nungi...

Russia nung tir election tenzükogo...

Russia anüdoklen Chukotka aser Kamchatka region tem nung polling station mezüng anepdang 8:00 ako nung lapoka liasü. Iba election ya tera rata agir, kechiaser arishi küm 71 tain Putin den tokteper tejangja mali. Pa den tokteper ya kar tepuokdak lir mesüra bendang lima nung jenoka lir, aser item rongnung tetashiba Alexei Navalny ya tawa ang Arctic penal colony ka nung asü. Election ya tetsükdaksü kecha makai sadema agitsü ta observer temi meimlar. Vote agütsüsupur asoshi candidate shimtsü nübu peria agüja mali.

Polling stations nung observers mapa inyaktü atema register süa aliba candidates mesüra sorkari yariba advisory body tem dang shima lir. Vote ya polling stations 100,000 jungnüa nung asemnü agütsüsü. Yimten yimsüsür anati iba election nung tokteptsü merang, saka Kremlin-i nokdang, anungji Putin den tokteptsüpur nübu tejangja madoker. Voting ya linük antiolen tsütsü Kaliningrad nung Deobar nikonngang 8:00 ako nung tembangtsü, kong vote agütsüsü temsüa alir nisung million 114 lir.

| ANGAMI SPORTS ASSOCIATION 52nd Wrestling Meet 16th March, 2024 Kohima Local Ground | |
|---|-------------------------|
| RANGE POSITION HOLDERS | |
| SOUTHERN ANGAMI | |
| 1st | - Atuo Tevo |
| 2nd | - Kekhrrie Yhoshü |
| 3rd | - Ruokuovituo Lese |
| 4th | - Kevidel Mekro |
| NORTHERN ANGAMI | |
| 1st | - Kezhasseluo-o Pienyü |
| 2nd | - Menuosetuo Yiese |
| 3rd | - Vizakietuo Suohu |
| 4th | - Neizosetuo Kire |
| WESTERN ANGAMI | |
| 1st | - Seyiejalie Gwirie |
| 2nd | - Rokohluto Suokhrrie |
| 3rd | - Thejapfutuo Chüsi |
| 4th | - Rokuokehie Khawakhrie |
| CHAKHROMA | |
| 1st | - Keneisetuo Kire |
| 2nd | - Visato Niphi |
| 3rd | - Vikemetoho Zecho |
| 4th | - Keneivilie Meyase |

School curriculum nung kaketshir indang social...

Kaketshir timba dak pei meimba tashi ajema aliba sayur ta kaketshir timbai bilemer. Kaketshir temi külem kaketshir aser tesayurtem den classroom telung aser tezülen tesendaktep tajungba yanglutsü nungdaker ta tesayur shilem 53.3 ajanga bilemba ashi. Kaketshir temi mangatetba lemsateptsü mesüra classroom nung ola adoka jembitsü nungnangba indang tesayur

asert kaketshir temi ashi, anungji tesayur temi tanur yimya asadangtsü tasakba akumer. Kaketshirtem takum nung shisa agütsür maliba aser azungtsü asoshi ajungmesor aser teyarir nungdakba ajitet, ta parnoki ashi. Curriculum ajanga kaketshir indang social aser emotional well-being tali tejangjaba nung angatetdaksütsü asoshi tesayur nem capacity building agütsüsü

nungdaker, ta parnoki ashi. Parnokisa kaketshirtem asoshi 'safe learning space' agütsüsü, tesayurtem sayuba yimya tajungba kumdaksütsü, life skills sessions ajanga temesepba chiyongtsü achi-ajemba tebilemstü lemsateptsü, kaketshir dak rangloker tesayur asoshi maneni professional development mapa inyaktü parnokisa ashi.

BILEMDANGANG
"Na mejungi amshiba atema sasaba mapang ka arutsü."